

摘藻堂四庫全書薈要

史部

欽定四庫全書薈要

史部

舊五代史卷十五至
十八

詳校官內閣侍讀孫球



欽定四庫全書蒼要卷五千四百十六

舊五代史卷十五

宋門下侍郎參知政事監修國史薛居正等撰

書第十五

列傳五

韓建字佐時許州長社人父叔豐世為牙校初秦宗權之據蔡州招合亡命建隸為軍士累轉至小校唐中和初忠武監軍楊復光起兵于蔡宗權遣其將鹿晏弘赴

之建與里人王建俱隸晏弘軍入援京師賊平復光暴卒時僖宗在蜀晏弘率所部赴行在路出南山因攻剽郡邑據有興元晏弘自為留後以建為蜀郡刺史唐軍容使田令孜密遣人誘建啗以厚利建時懼為晏弘所併乃率所部歸行在令孜補為神策都校金吾將軍出為潼關防禦使兼華州刺史河潼經大寇之後戶口流散建披荆棘闢污萊勸課農事樹植蔬果出入閭里親問疾苦不數年流亡畢復軍民充實建比不知書治郡

之暇日課學習遣人於器皿牀榻之上各題其名建視
之既熟乃漸通文字俄遷華商節度潼關守捉等使累
加檢校太尉平章事乾寧二年建與鳳翔李茂貞邠州
王行瑜舉兵赴闕迫昭宗請以王珙為河中帥害大臣
于都下河中王珂召晉軍以為援及晉軍渡河昭宗幸
石門三年四月昭宗遣延王通王率禁兵討李茂貞為
茂貞所敗車駕幸渭橋翼日次富平將幸河中建奉表
迎駕俄自至渭北懇乞東幸許之七月十五日昭宗至

華下百官士庶相繼而至建尋加兼中書令充京畿安撫制置等使又兼京兆尹京城把截使昭宗久在華州思還宮掖每花朝月夕遊宴西谿與羣臣屬詠歌詩歡歎流涕建每從容奏曰臣為陛下修營大內結信諸侯一二年間必期興復乃以建兼領修創京城使建自華督役輦運工作復治大明宮四年二月有詣建告睦王已下八王謀殺建建囚八王於別宅放散隨駕殿後軍二萬人殺捧日都頭李筠自是天子益微宿衛之士盡

矣八月建以兵圍十六宅通王已下十一王並遇害于石堤谷以謀逆聞又害太子詹事馬道殷將作監許巖士貶宰相朱朴皆昭宗寵昵者也建尋兼同州節度使光化元年升華州為興德府以建為尹八月車駕還京九月冊拜太傅進封許國公并賜鐵券天復元年十一月宦官韓全誨迫天子幸鳳翔建亦預其謀太祖聞知自河中引軍而西前鋒至同州建判官司馬鄴以城降遂移軍迫華州建懼乞降太祖責以脅君之罪建拜伏

稱從事李巨川之謀也太祖即誅巨川

北夢瑣言韓建曰某不識字凡

朝廷章奏鄰封書檄皆巨川為之因斬之又新唐書李

巨川傳云巨川詣軍門納款因言當世利害全忠屬官

敬翔以文翰事左右疑巨川用則全忠待已或哀乃詭

說曰巨川誠竒才顧不利主人若何是日全忠殺之

太祖與建素有軍中昆弟之契及見其怒驟息尋表建

為許州節度使昭宗東遷以建為祐國軍節度使京兆

尹車駕至陝召太祖與建侍宴宮妓奏樂何皇后舉觴

以賜太祖建躡足太祖遽起曰臣醉不任偽若顛仆即

去建私謂太祖曰上與宮人附耳而語幕下有兵仗聲

恐圖王爾天祐三年改青州節度使及受禪徵為司徒
平章事充諸道鹽鐵轉運使開平二年加侍中充建昌
宮使三年郊祀於洛以建為大禮使建為上宰每謁見
時有直言太祖為性剛嚴羣下將迎不暇待建稍異故

優容之九月冊拜太保罷知政事

五代會要開平三年十月詔曰太保韓建

每月旦十五日入閣稱賀即令赴朝參餘時弗入見示優禮也

四年三月除匡國軍節

度使陳許蔡觀使仍令中書不議除替

五代會要乾化元年正月敕云

許昌雄鎮太保韓建朕用以布政民耕盜止久居其位庶可勝殘矣宜令中書門下不計年月勿議替

乾

化二年六月朝廷新有內難人心動搖部將張厚因作亂害建於衙署時年五十八子從訓昭宗在華時授太子侍學賜名文禮尋拜屯田員外郎國初為都官郎中賜紫年未弱冠時朝廷命從訓告國哀於陳許至二日軍亂與建併命乾化三年追贈太師

李罕之陳州項城人父文世田家罕之拳勇趨捷力兼數人少學為儒不成又落髮為僧以其無賴所至不容會乞食於酸棗縣自旦至晡無與之者乃擲鉢於地毀

棄僧衣亡命為盜會黃巢起曹濮罕之因合徒作剽漸
至魁首及賊巢渡江罕之因以兵將背賊歸於唐高駢
錄其功表為光州刺史歲餘為蔡賊秦宗權寇迫不能
守乃棄郡歸項城收合餘衆依河陽諸葛爽署為懷州
刺史光啟初僖宗以爽為東南面招討以擊宗權爽乃
表罕之為副令將兵屯宋州蔡寇兗熒日熾兵鋒不敵
中和四年爽表罕之為河南尹東郡留守是歲李克用
脫上源之難歛軍西歸路由洛陽罕之迎謁供帳館待

甚優因與克用厚相結託時罕之有衆三千以聖善寺

為府光啟元年蔡賊秦宗權遣將孫儒來攻罕之對壘

數月以兵少備竭委城而遁西保於澠池蔡賊據京城

月餘焚燒宮闕剝居民賊既退去鞠為灰燼寂無雞

犬之音罕之復引其衆築壘於市西明年冬諸葛爽死

其將劉經推爽子仲方為帥經懼罕之難制自引兵鎮

洛陽罕之部曲有李塘郭璆者情不相叶欲相圖害罕

之怒誅璆軍情由是不睦劉經因其有間掩擊罕之于

澠池軍亂保乾壕經急攻之為罕之所敗罕之乘勝追至洛陽時經保敬愛寺罕之保苑甲飛龍廡罕之激勵其衆攻敬愛寺數日因風縱火盡燬之經衆奔竄追斬殆盡罕之進逼河陽營於鞏縣陳舟於汜水將渡諸葛仲方遣將張言率師拒於河上時仲方年幼政在劉經諸將心多不附張言密與罕之修好經知其謀言懼引衆渡河歸罕之因合勢攻河陽為經所敗罕之與言退保懷州冬蔡將孫儒陷河陽仲方汎輕舟來奔孫儒遂

自稱節度使俄而蔡賊為我軍所敗孫儒棄河陽歸蔡
罕之與言收合其衆求援於太原李克用遣澤州刺史
安金俊率騎助之遂收河陽克用表罕之為節度同平
章事又表言為河南尹東都留守罕之既與言患難交
契刻臂為盟永同休戚如張耳陳餘之義也罕之雖有
膽決雄猜翻覆而撫民御衆無方略率多苛暴性復貪
冒不得士心既得河陽出兵攻晉絳時大亂之後野無
耕稼罕之部下以俘剽為資啖人作食絳州刺史王友

遇以城降罕之乃進攻晉州河中王重盈遣使求援于
太祖時張言治軍有法善積聚勤于播植軍儲不乏言
輸粟于罕之以給其軍罕之求索無限言頗苦之力不
能應罕之則錄河南府吏笞責之東諸侯修貢行在多
為罕之邀留王重盈苦其侵削密結張言請圖之文德
元年春會罕之盡出其衆攻平陽言夜出師掩擊河陽
罕之無備單步僅免舉族為言所俘罕之奔於太原李
克用表為澤州刺史仍領河陽節度使三月克用遣其

將李存孝率師三萬助之來攻懷孟城中食盡備豫皆竭張言遣其孥入質且求救於太祖太祖遣葛從周牛存節赴之逆戰於流河店會晉將安休休以一軍奔於蔡存孝引軍而退罕之保於澤州自是罕之日以兵寇鈔懷孟晉絳數百里內郡邑無長吏閭里無居民河內百姓相結屯寨或出樵汲即為俘馘雖竒峯絕磴梯危架險亦為罕之部衆攻取先是蒲絳之間有山曰摩雲邑人立棚於上以避寇亂罕之以百餘人攻下之軍中

因號罕之為李摩雲自是數州之民屠啖殆盡荆棘蔽野烟火斷絕凡十餘年乾寧二年李克用出師以拒邠鳳營於渭北天子以克用為邠州行營四面都統克用乃表罕之為副及誅王行瑜罕之以功授檢校太尉食邑千戶罕之自以功多私謂晉將蓋寓曰余自河陽失守來依巨廕歲月滋久功效未施比年以來倦於師旅所謂老夫耄矣無能為也望吾王仁愍太傅哀憐與一小鎮休兵養疾一二年間即歸老菟裘幸也寓為言之

克用不對每藩鎮缺帥議所不及罕之私心鬱鬱蓋寓
懼其他圖亟為論之克用曰吾於罕之豈惜一鎮吾有
罕之亦如董卓之有呂布雄則雄矣鷹鳥之性飽則颺
去實懼翻覆毒余也光化元年十二月晉之潞帥薛志
勤卒罕之乘其喪自澤州率衆徑入潞州自稱留後以
狀聞於克用曰聞志勤之喪新帥未至慮為佗盜所窺
不俟命已屯於潞矣克用怒遣李昭嗣討之罕之執其
守將馬漑伊鐸何萬友沁州刺史傅瑤等遣其子顯拘

送於太祖以求援焉

新唐書全忠表罕之昭義軍節度使

會罕之暴病不

能視事明年六月病篤太祖令丁會代之移罕之為河陽節度使行至懷州卒於傳舍時年五十八其子顯以舟載柩歸葬河陰縣開平二年春詔贈中書令

馮行襲字正臣武當人也歷職為本郡都校中和中僖宗在蜀有賊首孫喜者聚徒數千人欲入武當刺史呂昱惶駭無策畧行襲伏勇士於江南乘小舟逆喜謂喜曰郡人得良牧衆心歸矣但緣兵多民懼擄掠若駐軍

江北領肘腋以赴之使某前導以慰安士民可立定也
喜然之既渡江軍吏迎謁伏甲奮起行襲擊喜仆地仗
劍斬之其黨盡殪賊衆在江北者悉奔潰山南節度使
劉巨容以功上言尋授均州刺史州西有長山當襄漢
蜀路羣賊屯據以邀刦貢奉行襲又破之洋州節度使
葛佐奏辟為行軍司馬請將兵鎮谷口通秦蜀道由是
益知名李茂貞遣養子繼臻竊據金州行襲攻下之因
授金州防禦使時興元楊守亮將襲京師道出金商行

襲逆擊大破之詔升金州為節鎮以戎昭軍為額即以
行襲為節度使及太祖義旗西征行襲遣副使魯崇矩
稟受制令會唐昭宗幸鳳翔太祖帥師奉迎久之未出
中尉韓全誨遣中官郗文晏等二十餘人分命矯詔欲
徵江淮兵屯於金州以脅太祖之軍行襲定策盡殺之
收其詔勅送於太祖天祐元年兼領洋州節度使太祖
之伐荆襄行襲令其子勗以舟師會於均房預收復功
遷匡國軍節度使到任誅大吏張澄暴其罪州人莫不

惴懾在許三年上供外別進助軍羨糧二十萬石及太祖郊禋行襲請入覲貢獻巨萬恩禮殊厚尋詔翰林學士杜曉撰德政碑以賜之累官至兼中書令再拜司空開平中卒輟朝一日贈太傅謚曰忠敬行襲性嚴烈為政深刻然所至有天幸境內嘗大蝗尋有羣鳥啄食不為害民或艱食必有糴穀出於墮畝雖威福在已而恒竭力以奉於王室故能保其功名行襲魁岸雄壯面有青誌當時目為馮青面長子勗歷蘄沁二州刺史次子

德晏仕至金吾將軍

孫德昭鹽州五原縣人世為州校父惟最有功於唐朝
遙領荆南節度分判右神策軍事德昭藉父蔭累職為
右神策軍都指揮使光化三年唐昭宗為闈官所廢矯
立德王時中外以權在禁闈莫能致討近藩朋附章表
繼有至者丞相崔胤外與太祖申結輔佐之好內遣心

腹密講忠義有以事喻德昭者

通鑑德昭常憤惋不平
崔胤聞之遣判官石戩

與之遊德昭每酒酣必泣戩
知其誠乃密以胤意說之

德昭感慨乃與本軍孫承

誨董從實三人奮發應命誓圖返正崔又割衣手筆以通其志天復元年正月一日未旦逆豎左軍容劉季述早入德昭伏甲要路以俟追其前驅邀而斬之孫承誨等分捕右軍容王仲先黨伍唐昭宗方幽辱東內聞外喧大恐德昭馳至扣閣曰逆賊劉季述伏誅矣請上皇開鑰復皇帝位皇后何氏呼曰汝可進逆人首門乃可開俄而承誨從實俱以馘獻昭宗悲而嘉之於是丞相崔胤奉迎御丹鳳樓率百辟待罪泣且奏曰臣居大位不

能討姦賴東平王全忠首奮忠貞誅殺邸吏遂致德昭
等擒戮妖逆再清禁闈即日議功以德昭為檢校太保
靜海軍節度使承誨邕州節度使從實容州節度使並
同平章事錫姓李賜號扶傾濟難忠烈功臣圖形凌烟
閣俱留京師錫賚宴賞之厚恩寵權倖之勢近代罕比
其年十一月闈宦韓全誨縱火脅昭宗西幸鳳翔承誨
從實並變節為中官所誘始欲驅擁百寮將圖出令而
德昭獨按兵與太祖親吏婁敬思叶力衛丞相及文武

百官與長安吏民保於街東免為所劫太祖遣從事相繼勞問遺以龍鳳劍鬪鷄紗委令制輯於是百官次華州連狀請太祖迎奉及大旆入闕德昭以軍禮上謁立道左太祖命左右扶騎控至長安賜與甚厚署權知同州節度留後將赴任復徇民請留充兩街制置使賜錢百萬德昭以本部兵八千人獻於太祖由是愈見賞重又賜甲第一區俾先還洛陽及昭宗東遷奏授左威衛上將軍以病免歸於別墅太祖受禪以左領衛上將軍

徵赴闕開平四年拜左金吾大將軍充街使末帝即位
俾將命於兩浙對見失儀不果行尋改授右武衛上將
軍俄復左金吾大將軍卒於官詔贈太傅輟視朝一日
天復初德昭與孫承誨董從實以返正功時人呼為三
使相思澤俱冠世及承誨至鳳翔易名繼誨從實改名
彥弼皆為李茂貞所養後閹官之敗俱戮於京師惟德
昭克全終始有所稱云

趙克裕河陽人也祖父皆為軍吏克裕少為牙將好讀

書謹儀範牧伯皆竒待之累居右職擢為虎牢闕使光
啟中蔡寇陷河陽克裕率所部歸於太祖隸於宣義軍
太祖東征徐鄆克裕屢受指顧無不如意數年之內繼
領亳鄭二州刺史時闕東藩鎮方為蔡寇所毒黎元流
散不能相保克裕妙有農戰之備復善於綏懷民賴而
獲安者衆太祖表為河陽節度使檢校右僕射尋移理
許田入為金吾衛大將軍檢校司空及太祖為元帥以
克裕為元帥府左都押衙復統六軍兗州平命權知秦

寧軍留後數月暴疾而卒開平初追贈太保

張慎思清河人自黃巢軍來歸累授軍職歷諸軍都指揮使從平巢蔡兗鄆皆著功表授檢校工部尚書兼宋州長吏光化中加檢校右僕射權知亳州天復三年昭宗還長安以從太祖迎駕功賜號迎鑿毅勇功臣尋除汝州防禦使天祐元年授左龍武統軍其冬除許州匡國軍節度使明年十一月權知徐州武寧軍兩使留後太祖受禪入為左金吾大將軍開平二年除宋州刺史

未幾復拜左金吾大將軍三年冬除蔡州刺史以貪貨
大失民情詔追赴闕未幾扈從北征還以疾卧洛陽之
私第馭家不肅為其子所弑

史臣曰韓建遇唐朝之衰運據潼關之要地不能藩屏
王室翻務斷喪宗枝雖有阜俗之能何補不臣之咎罕之
負驍雄之氣蓄嚮背之謀武皇比之呂布斯知人矣行
襲勵納忠之節德昭立反正之功俱善其終固其宜矣
克裕而下無譏可也

欽定四庫全書

舊五代史
卷一百一十五

舊五代史卷十五

舊五代史卷十五攷證

梁列傳五韓建傳又害太子詹事馬道殷將作監許巖
士○案新唐書昭宗紀正月乙酉韓建殺扈蹕都將
李筠二月殺太子詹事馬道殷將作監許巖八月殺
通王滋沂王湮韶王彭王嗣韓王嗣陳王嗣覃王嗣
周王嗣延王戒丕嗣丹王允通鑑與新唐書同是書
以殺李筠為二月事以殺馬道殷許巖士為八月事蓋
本于舊唐書昭宗紀

李罕之傳伊鐸○案歐陽史作伊鐸

遣其子顥○案歐陽史作遣子頎

馮行襲傳尋授均州刺史○案新唐書本紀光啓元年
四月武當賊馮行襲陷均州逐其刺史呂昱蓋行襲
既殪孫喜遂自據其郡也是書作中和間事與唐書
異歐陽史仍從是書

孫德昭傳父惟晟有功于唐朝○案惟晟歐陽史作惟
勗攷新唐書亦作惟晟今仍其舊

乃與本軍孫承誨董從實二人○案孫承誨董從實新舊唐書並作周承誨董彥弼攷承誨姓周與孫未知孰是從實改名彥弼見本傳後文與是書同

趙克裕傳尋移理許田○案克裕移理許田是書未明言其故新唐書本紀朱全忠陷孟州逐河陽節度使趙克裕據通鑑則克裕移鎮因梁祖欲以張全義領河陽也新唐書所紀疑非事實

欽定四庫全書蒼要卷五千四百十七

舊五代史卷十六

宋門下侍郎參知政事監修國史薛居正等撰

梁書第十六

列傳第六

葛從周字通美濮州鄆城人也曾祖阮祖遇賢父簡累
贈兵部尚書從周少豁達有知畧初入黃巢軍漸至軍
校唐中和四年三月太祖大破巢軍于王滿渡從周與

霍存張歸霸昆弟相率來降七月從太祖屯兵于西華

破蔡賊王夏寨太祖臨陣馬踣賊衆來追甚急從周扶

太祖上馬與賊軍格鬪傷面矢中于肱身被數槍奮命

以衛太祖賴張延壽迴馬轉鬪從周與太祖俱免退軍

澗水諸將並削職惟擢從周延壽為大校其後入長葛

靈井大敗蔡賊至斤溝淝河殺鐵林三千人獲九寨都

虞候王涓太祖遣郭言募兵于陝州有黃花子賊據于

溫谷從周擊破之又破秦賢之衆于滎陽尋佐朱珍收

兵于淄青間時兗州齊克讓軍于任城從周敗之擒其將呂全真淄人不受制復與之戰獲其驍將鞏約會青州以步騎萬餘人列三寨于金嶺以扼要害從周與朱珍大殲其衆擄其將楊昭範五人而還至大梁不解甲徑至板橋擊蔡賊破盧塘寨塘自溺而死又于赤堍殺蔡軍二萬餘人從討謝殷于亳州擒之迴襲曹州擄刺史邱弘禮以歸與兗鄆軍遇于臨濮之劉橋殺數萬人朱瑄朱瑾僅以身免擒都將鄒務卿已下五十人從太

祖至范縣復與朱瑄戰擄尹萬榮等三人遂平濮州未

幾與朱珍擊蔡賊于陳毫間獲都將石璠文德元年魏

博軍亂樂從訓來告急從太祖渡河拔黎陽李固臨河

等鎮至內黃破魏軍萬餘衆獲其將周儒等十人李罕

之引并人圍張全義于河陽從周與丁會張存敬牛存

節率兵赴援大破并軍殺蕃漢二萬人解河陽之圍以

功表授檢校工部尚書從朱珍討徐州拔豐縣敗時溥

于吳康得其輜重加檢校刑部尚書佐龐師古討孫儒

于淮南略地至廬壽滁等州下天長高郵破邵伯堰迴
軍攻濠州殺刺史魏勲得餉船十艘大順元年八月并
帥圍潞州太祖遣從周率敢死之士夜銜枚犯圍而入
會王師不利于馬牢川卽棄上黨而歸其年十二月與
丁會諸將討魏州連收十邑明年正月大破魏軍于永
定橋魏軍五敗斬首萬餘人十月佐丁會攻宿州從周
壅水灌其城刺史張筠以郡降從討兗州破朱瑾之軍
于馬溝景福二年二月與諸將大破徐兗之兵于石佛

山八月與龐師古同攻兗州乾寧元年三月軍至新太

縣朱瑾令都將張約李胡椒率三千人來拒戰師古遣

從周張存敬掩襲生擒張約李胡椒等都將數十人二

年十月圍兗州兗人不出從周詐揚言并人鄆人來救

即引軍趨高吳夜半却潛歸寨朱瑾果出兵攻外壕我

軍士突出掩殺千餘人生擒都將張漢筠從周累立戰

功自懷州刺史歷曹宿二州刺史累遷檢校左僕射三

年五月并帥以大軍侵魏遣其子落落率二千騎屯洹

水從周以馬步二千人擊之殺戮殆盡擒落落于陣并帥號
泣而去遂自洹水與龐師古渡河擊鄆四年正月下之從
周乘勝伐兗會朱瑾出師在徐境其將康懷英以城降
以功授兗州留後檢校司空

玉堂閒話云葛侍中鎮兗
之日威名著于敵中河北

諺曰山東一條
葛無事莫捺捺

復領兵萬餘人渡淮討楊行密至濠州

聞龐師古清口之敗遽班師光化元年四月率師經略
山東時并帥以大軍屯邢洛從周至拒鹿與并軍遇大
破之并帥遁走我軍追襲至青山口數日之內邢洛磁

三州連下斬首二萬級獲將吏一百五十人即以從周兼領邢州留後十月復破并軍五千騎于張公橋晉將李嗣昭急攻邢州陣于城門外從周大破之擒蕃將賁金鐵慕容騰百餘人二年春幽州劉仁恭率軍十萬寇魏州屠貝郡從周自邢臺馳入魏州燕軍突上水關攻館陶門從周與賀德倫率五百騎出戰謂門者曰前有敵不可返顧命闔其門從周等極力死戰大敗燕人擒都將薛突厥王卻郎等翼日破其八寨追擊至臨清劉

仁恭走滄州從周授宣義軍行軍司馬五月并人討李
罕之于潞州太祖以丁會代罕之令從周馳入上黨七月
并人陷澤州太祖召從周令賀德倫守潞州德倫等尋
棄城而歸三年四月領軍討滄州先攻德州下之及進
攻孚陽幽州劉仁恭大舉來援時都監蔣玄暉謂諸將
曰吾王命我護軍志在攻取今燕帥來赴不可外戰當
縱其入壁聚食困廩力屈糧盡必可取也從周對曰兵
在機機在上將非督護所言也乃令張存敬氏叔琮守

其寨從周逆戰于乾寧軍老鷓堤大破燕軍斬首三萬
獲將佐馬慎交已下百餘人奪馬三千匹八月并人攻
邢洺從太祖破之從周追襲至青山口斬首五千級獲
其將王郃郎楊師悅等得馬千匹表授檢校太保兼徐
州兩使留後尋為兗州節度使天復元年三月與氏叔
琮討太原從周以兗鄆之衆自土門路入與諸軍會于
晉陽城下以糧運不給班師頃之從周染疾會青州將
劉鄩陷兗州太祖命討之遂力疾臨戎三年十一月鄩

舉城降以功授檢校太傅太祖以從周抱疾既久命康
懷英代之授左金吾上將軍以風恙不任朝謁改右衛
上將軍致仕養疾偃師縣毫邑鄉之別墅頃之授太子
太師依前致仕末帝即位制授潞州節度使令坐食其
俸加開府儀同三司檢校太師兼侍中封陳留郡王累
食邑至七千戶命近臣賞旌節就別墅以賜之貞明初
卒于家冊贈太尉

謝彥章許州人幼事從周為養父從周憐其敏慧教以

兵法常以千錢于大盤中布其行陣偏伍之狀示以出沒進退之節彥章盡得其訣及壯事太祖為騎將末帝嗣位用為兩京馬軍都軍使累與晉軍接戰有功尋領河陽節度使及從周卒臨喪行服躬預葬事時人義之彥章後為許州節度使檢校太傅貞明四年冬滑州節度使賀瓌為北面招討使彥章為排陣使同領大軍駐于行臺寨與晉人對壘彥章時領騎軍與之挑戰晉人或望我軍行陣整肅則相謂曰必兩京太傅在此也不

敢以名呼其為敵人所憚如此是時咸謂賀瓌能將步軍彥章能領騎士既名聲相軋故瓌心忌之一日與瓌同設伏于郊外瓌指一方地謂彥章曰此地岡阜隆起中央坦夷好列柵之所尋而晉人舍之故瓌疑彥章與晉人通又瓌欲速戰彥章欲持重以老敵人瓌益疑之會為行營馬步都虞候朱珪所誣瓌遂與珪協謀因享士伏甲以殺彥章及濮州刺史孟審澄別將侯溫裕等于軍以謀叛聞晉王聞之喜曰彼將帥如是亡無日矣

審澄溫裕亦善將騎軍然所領不過三千騎多而益辦
惟彥章有焉將略之外好優禮儒士與晉人對壘于河
上恒褒衣博帶動皆由禮或臨敵御衆則肅然有上將
之威每敦陣整旅左旋右抽雖風馳雨驟亦無以喻其
迅捷也故當時騎士咸樂為用及其遇害人皆惜之

胡真江陵人體貌洪壯長七尺善騎射少為縣吏及在
巢寇中推為名將隨巢涉淮浙陷許洛入長安及太

祖以衆歸唐真時為元從都將

通鑑云溫見巢兵勢日
蹙知其將亡親將胡真

謝瞳勣
溫歸國從至梁苑表授檢校刑部尚書頻從破巢蔡于

陳鄭間尋以奇兵襲取滑州乃署為滑州節度留後復
表為鄭滑節度使檢校右僕射數年徵為右金吾衛大
將軍俄拜寧遠軍節度使容州刺史檢校太保卒贈太
傅

張歸霸字正臣清河人祖進言陽穀令父實亦有宦緒
少倜儻好兵術唐乾符中寇盜蜂起歸霸率昆弟三人
棄家投黃巢頗以勇略聞巢陷長安遂署為左蕃功臣

中和中巢領徒走宛邱時太祖在汴奉詔南討巢黨日
寗歸霸昆仲與葛從周李謹等相率來降尋補宣武軍
劇職光啟二年與蔡將張存戰于盧氏三年夏又與蔡
將盧瑋戰于雙邱復與秦宗賢戰于萬勝皆敗而殲之
翼日宗權遣將張邳來寇列寨于赤堦一日出騎將較
勝歸霸為飛戈所中卽拔馬却逸控弦一發賊洞頸而
墜遂兼騎而還太祖時于高邱下瞰備見其狀面加賞
激厚以金帛及所獲馬錫之又嘗被命以控弦之士五

百人伏于壕內太祖統數百騎稍逼其寨蔡人果以銳
士摩壘來追歸霸發伏兵掩殺千餘人奪馬數十匹尋
奏授檢校左散騎常侍其後從太祖伐鄆副李唐賓渡
淮咸著竒績文德初大軍臨蔡州賊將蕭顥來斫寨歸
霸與徐懷玉各以所領兵自東南二扉分出合勢殺賊
蔡人大敗及太祖整衆離營寇塵已息太祖召至賞之
曰昔耿弇不俟光武擊張步言不以賊遺君父弇之功
爾其二焉大順中郭紹賓拔曹州歸霸提兵數千守之

俄而朱瑾統大軍自至歸霸與丁會逆擊之于金鄉瑾

大敗擒賊將宗江等七十餘人曹州以寧明年破濮州

生擒刺史邵儒又佐葛從周與晉軍戰于洹水生獲兗

用愛子落落復與燕人戰于內黃殺仁恭兵三萬餘衆

戎績超特居諸將之右累官至檢校左僕射光化二年

權知邢州事明年春李嗣昭以蕃漢五萬來寇歸霸堅

壁設備晉軍不敢顧其城遂移軍攻洺州陷焉時太祖

在滑頗慮邢之失守及葛從周復洺嗣昭北遁歸霸出

兵襲之殺二萬餘衆捷至賞錫殊等旋以功奏加檢校
司空天祐初遷萊州刺史秩滿授左衛上將軍又除曹
州刺史其秋加檢校司徒副劉知俊禦邠鳳之寇敗之
太祖受禪拜右龍虎統軍改左驍衛上將軍充河陽諸
軍都指揮使明年夏六月就除河陽節度使檢校太保
尋加同平章事二年秋七月卒于位詔贈太傅梁末帝
德妃張氏即歸霸女也未帝嗣位以歸霸子漢鼎漢傑
並為近職漢鼎早亡漢傑貞明中為控鶴指揮使領兵

討惠王于陳州擒之當貞明龍德之際漢傑昆仲分掌
權要藩鎮除拜多出其門段凝因之遂竊兵柄及莊宗
入汴漢傑與兄漢倫弟漢融同日伏誅于汴橋下

張歸厚字德坤

通鑑攷異引梁功臣列傳云歸厚祖興父處讓

少驍勇有機略

尤長于弓槊之用中和末與兄歸霸自巢軍相率來降
太祖署為軍校時淮西兵力方壯太祖之師尚寡歸厚
以少擊衆往無不捷光啟三年春與秦宗賢戰于萬勝
大破之其夏蔡將張晷以數萬衆屯于赤堽歸厚嘗與

晁單騎鬪于陣晁不能支而奔師徒乘此大捷太祖大
悅立署為騎軍長仍以鞍馬器幣錫之及佐朱珍討時
溥寨于豐蕭之間歸厚乘徐壘如行坦途甚為諸將歎
伏龍紀初奏遷檢校工部尚書其年冬復伐徐歸厚以
偏師逕進至九里山下與徐兵遇時我之叛將陳璠在
賊陣中歸厚忽見之因嗔目大罵單馬直往期于必取
會飛矢中左目而退徐戎甚衆莫敢追之大順元年奏
加檢校兵部尚書又命統親軍是歲柳王遷寨未知所

往忽逢兗郟賊寇甚衆太祖亟登道左高阜以觀之命
歸厚領所部廳子馬直突之出沒二十餘合賊大敗將
北而救軍雲至歸厚即綴賊苦戰請太祖以數十騎先
還時歸厚所乘馬中流矢而踣乃持槊步鬪漸退賊不
敢逼太祖至寨亟命張筠劉儒飛騎來迎然謂已歿矣
歸厚體被二十餘箭尚復拒戰筠等既至賊解乃歸太
祖見之撫背泣下曰得歸厚身全縱廣喪戎馬何足計
乎便令肩舁歸汴日降問賚恩旨甚厚尋遷中軍指揮

使景福初從太祖伐鄆帝軍不利太祖為寇所逼歸厚
殿馬翼衛左右馳射矢發如雨賊騎千百披靡而退明
年與葛從周禦晉軍于洹水殊績尤著詔加檢校右僕
射其後討滄州復洺州咸以功聞太祖錄其勲命權知
洺州事是郡嘗兩為晉人所陷井邑蕭條歸厚撫之數
月之內民庶翕然太祖自鎮定還覩其緝理之政大喜
賞之天復元年冬真拜洺州刺史加檢校左僕射尋授
絳州刺史三年秋改晉州刺史仍檢校司空唐帝遷都

洛陽除右神武統軍天祐二年改左羽林統軍與徐懷
玉同守澤州時晉軍五萬來攻郡中戎士甚寡歸厚極
力拒守并軍乃還太祖受禪加檢校司空開平二年夏
劉知俊以同州叛歸厚副楊師厚劉鄩等討平之秋軍
還授亳州團練使乾化元年拜鎮國軍節度使陝虢等
州觀察處置等使明年夏以疾卒于位詔贈太師子漢
卿

張歸弁字從冕始與兄歸霸歸厚同歸于太祖得署為

牙校時太祖初鎮宣武屢命歸弁結好于近境頗得行人之儀乾寧中以偏師佐葛從周禦弁軍于洹水光啟中又佐張存敬與燕人戰于內黃積前後功表授檢校工部尚書大順初攻討兗鄆命歸弁佐衡王友謙屯單父軍聲大振尋為齊州指揮使屬青帥王師範叛遣將詐為賈人挽車數十乘匿兵器于其中將謀竊發歸弁察而擒之州城以寧明年春青寇大舉來伐州兵既寡民意頗搖有本郡都將康文奐等三人欲謀外應卽時

擒獲誅之人心遂定歸弁又罄發私帑賞給士伍青人

遂遁青州平超加檢校右僕射遙領愛州刺史從征荆

襄迴轉檢校左僕射天祐三年春太祖入魏誅牙軍魏

之郡邑多叛歸弁與諸將等分布攻討封境悉平而歸

弁于高唐攻賊太猛飛矢中于臆太祖嘉之命賜鞍勒

馬一匹金帶一條夏五月命權知晉州冬十一月真授

晉州刺史加檢校司空太祖受禪改滑州長劍指揮使

開平二年秋九月弁軍圍平陽詔歸弁統兵救之軍至

解其圍加檢校司空三年春三月寢疾卒于滑州之私第子漢融

史臣曰從周以驍武之才事雄猜之主而能取功名于馬上啟手足于牖下靜而言之斯為賢矣彥章蔚有將才死于讒口身既沒矣國亦隨之惜哉歸霸昆仲皆脫身于巨盜之流宣力于興王之運由介冑而析圭爵可不謂壯夫與

舊五代史卷十六

舊五代史卷十六攷證

梁列傳六葛從周傳破蔡賊王夏寨○王夏原本作五
夏今據通鑑改正

從周詐揚言并入鄆人來救○案通鑑朱瑄朱瑾告急
于河東李克用遣大將史儼李承嗣將數千騎假道
于魏以救之是河東實遣師來援非從周詐言也此
蓋見知充人告急乘并師尚未至乃揚言已至多方
以誤之耳又本紀作十二月此作十月辨正已見本

紀

養疾偃師縣亳邑鄉之別墅○別墅原本作別墅今改正

謝彥章傳必兩京太傅在此○兩京原本作西京今據

通鑑改正

張歸霸傳歸霸為飛戈所中○飛戈歐陽史作飛矢

張歸厚傳命歸厚領所部廳子馬○廳子馬原本作厲子馬考通鑑注廳子都係當時軍旅之名今改正

與葛從周禦晉軍于洹水○葛從周原本作郭從周今
據通鑑改正

欽定四庫全書薈要卷五千四百十八

舊五代史卷十七

宋門下侍郎參知政事監修國史薛居正等撰

梁書第十七

列傳七

成汭淮西人少年任俠乘醉殺人為讎家所捕因落髮

為僧冒姓郭氏

新唐書云入蔡賊中為賊帥假子更姓名為郭禹

亡匿久之及

貴方復本姓唐僖宗朝為蔡州軍校領本郡兵戍荆南

帥以其凶暴欲害之遂棄本軍奔于秭歸一夕巨蛇繞

其身幾至于殞乃祝曰苟有所負死生惟命遂巡蛇亦

解去後據歸州招輯流亡練士伍得兵千餘人泐流以

襲荆南遂據其地朝廷卽以旄鉞授之是時荊州經巨

盜之後居民才一十七家泐撫輯凋殘勵精為理通商

訓農勤于惠養比及末年僅及萬戶

案以下有闕文

泐性豪暴

事皆意斷又好自矜伐騁辯凌人深為識者所鄙初澧

朗二州本屬荆南乾寧中為土豪雷滿所據泐奏請割

隸唐宰相徐彥若執而不行洵由是銜之及彥若出鎮南海路過江陵洵雖加延接而猶怏怏嘗因對酒語及其事彥若曰今公位尊方面自比桓文雷滿者偏州一草賊爾今公何不加兵而反怨朝廷乎洵赧然而屈

案以

下有闕文

累官至檢校太尉封上谷郡王楊行密以兵圍鄂州洵出師以援鄂淮寇乘之以火焚其艦洵投江而死

天祐三年夏太祖以洵没于王事上表于唐帝請為洵立廟于荆門優詔可之

五代史補鄭準不知何許人性諒直能為文長于箋奏成洵鎮

荆南辟為推官。汭嘗讎殺人，懼為吏所捕，改性。郭氏及為荆南節度使，命準為表，乞歸本姓。準援筆而成其畧。云：臣門非冠蓋家，本軍戎親朋之內，盱眙為人報怨。昆弟之間，點染無處求生。背故國以狐疑，望隣封而鼠竄。名非霸越，乘舟難效于陶朱；志切投秦，出境遂稱于張祿。又云：成為本姓，郭乃冒稱。本避犯禁之辜，敢歸司寇。別族受封之典，誠愧諸侯。伏乞聖慈，許歸本姓。云云。其表甚為朝廷所重。後因汭生辰，淮南楊行密遣使致禮幣之外，仍貺初學記一部。準忿然以為不可，謂汭曰：夫初學記蓋訓童之書，爾今敵國交聘，以此書為貺，得非相輕之甚耶？宜書責讓。汭不納。準自嘆曰：若然，見輕敵國，足彰幕府之無人也。參佐無狀，安可久遠？請解職。汭怒其去，潛使人于途中殺之。

杜洪者江夏伶人，鍾傳者豫章小校，唐光啟中秦宗權

凶焰聽起屢擾江淮郡將不能城守洪傳各為部校因

戰立威逐其廉使自稱留後朝廷因而命之

新唐書光啟二年洪

乘虛入鄂自為節度留後僖宗即拜本軍節度使中和

三年傳逐江西觀察使高茂卿遂有洪州僖宗擢傳江

西團練使俄拜

鎮南節度使

及為楊行密所攻洪傳首尾相應皆遣

求援于太祖太祖遣朱友恭赴之大破淮寇于武昌二

鎮稍寧及行密乘勝急攻洪鄂洪復乞師于太祖太祖

命荆南成汭率荆襄舟師以赴之未至夏口汭敗溺死

淮人遂陷鄂州洪為其所擒被害于廣陵市時唐天復

二年也

九國志劉存傳存急焚鄂州城樓梁援兵將突圍而出諸將欲急擊之存曰擊之賊必復入復

入則城愈固矣不若聽其遁去諸將皆曰善是日城陷擒杜洪父子斬于廣陵市

天祐三年夏

太祖表請為洪立廟于其鎮優詔可之太祖即位詔贈

太傅先是鍾傳卒于江西其子繼之

九國志秦裴傳天祐三年洪州鍾傳

卒州人立其子匡時江州刺史延規傳之養子恣不得立以其郡納款因投裴西南面行營招討使攻匡時城

陷擒匡時以獻

尋為楊行密所敗其地亦入于淮夷

五代史補鍾傳雖起

于商販尤好學重士時江西士流有名第者多因傳薦四達騰然謂之曰英明諸葛浩素有詞學嘗為泗州管驛巡官仰傳之風因擇其所行事赫赫可稱者十條列于啟事以投之十啟凡五千字皆文理典瞻傳覽之驚

嘆謂賓佐曰此啟事每一字可以千錢酬之遂以五千貫贈仍辟在幕下其激勸如此○上藍和尚失其名居于洪州上藍院精究術數大為鍾傳所禮一旦疾篤往省之且曰老夫于和尚可謂無間矣和尚或不諱得無一言相付耶上藍強起索筆作偈以授其末云但看來年二三月柳條堪作打鍾槌偈終而卒傳得之不能測洎明年春淮帥引兵奄至洪州陷江南遂為楊氏有打鍾之偈人始悟焉

田頌本揚府之大校也

九國志頌字德臣廬州合肥人

朱延壽不知何

許人

九國志延壽廬州舒城人

唐天祐初楊行密據淮海時頌為

宣州節度使延壽為壽州刺史頌以行密專恣跋扈嘗移書諷之曰侯王守方以奉天子古之制也其或踰越者譬

如百川不朝于海雖狂奔猛注澶漫遐廣終為涸土不若恬然順流淼茫無窮也况東南之鎮揚為大塵賤刀布阜積金玉願公上恒賦願將悉儲峙具單車從行密怒曰今財賦之行必由于汴適足以資于敵也不從時

延壽方守壽春

九國志天復初北司擁駕西幸昭宗聞延壽有武幹遣李儼間道齎詔授延壽

蔡州節度使

直願之事密遣人告于願曰公有所欲為者願

為公執鞭願聞之頗會其志乃召進士杜荀鶴具述其意復語曰昌本朝奉盟主在斯一舉矣即遣荀鶴具述

密議自間道至大梁太祖大悅遽屯兵於宿州以會其

變不數月事微洩行密乃先以公牒徵延壽

新唐書行密妻延壽

姊也遣辯士召延壽疑不肯赴

姊遣婢報故延壽疾走揚州

次悉兵攻宣城額戎力

寡薄棄壁走不能越境為行密軍所得

九國志行密別遣臺蒙王茂章

率步騎以往額委舟師于汪建王壇自出廣德迎戰大

為濛所敗遂率殘眾遁保宛陵壇建聞其敗因盡以舟

師歸款于行密十二月額出外州

延壽飛騎赴命邇揚

柵疾戰橋陷馬墜為外軍所殺

州一舍行密使人殺之其後延壽部曲有逸境至者具

言其事又云延壽之將行也其室王氏勉延壽曰今若

得兵柄果成大志是吉凶繫乎時非繫于吾家也然願
日致一介以寧所懷一日介不至王氏曰事可知矣乃
部分家僕悉授兵器遽闔中扉而捕騎已至不得入遂
集家屬阜私帑發百燎合州燬焚之既而稽首上告曰
妾誓不以皎然之軀為讎者所辱乃投火而死

五代史補楊行

密據淮南以妻弟朱氏衆謂之朱三郎者行密署為泗
州防禦使泗州素屯軍朱氏驍勇到任恃衆自負行密
雖悔度力未能制但姑息之時議以為行密事勢去矣
居無何行密得目疾雖癒且詐稱失明其出入皆以人
扶策不爾則觸牆抵柱至于流血姬妾僕隸以為實然往
往無禮首尾僅三年朱氏聞之信而少懈弛行密度其計

必中謂妻曰吾不幸臨老兩目如此男女卑幼苟不諱則國家為他人所有今晝夜思忖不如名泗州三舅來使管勾軍府事則吾雖死無恨妻以為然遽發使述其意而召之朱氏大喜倍道而行及入謁行密恐其覺生于中堂以家人禮見朱氏頗有德色方設拜行密奮袖中鉄槌以擊之正中其首然猶宛轉號叫久而方斃行密內外不測即時升堂廳召將吏等謂之曰吾所以兩目失明者蓋為朱三此賊今已擊殺兩目無事矣諸公知之否于是軍府大駭其僕妾嘗所無禮者皆自殺初行密之在民間也嘗為合肥縣手力有過縣令將鞭之行密懼且拜會有客自外入見行密每拜則廳之前簷皆叩地而令不之覺客知其非常乃慮升廳揖令于他處告以所見令驚逆起之且勸事郡以自奮行密度本郡不足依乃投高駢駢死秦彥孫儒等作亂行密連誅之遂有淮南之地

趙匡凝

新唐書匡凝字光儀

蔡州人也父德諲初事秦宗權為列

校當宗權強暴時表為襄州留後唐光啟四年夏六月德諲審宗權必敗乃舉漢南之地以歸唐朝仍遣使投分于太祖兼誓戮力同討宗權時太祖為蔡州四面行營都統使乃表德諲為副仍領襄州節度使蔡州平以功累加官爵封淮安王匡凝以父功為唐州刺史兼七州馬步軍都校及德諲卒匡凝自為襄州留後朝廷即以旄鉞授之作鎮數年甚有威惠累官至檢校太尉兼

中書令匡凝氣貌甚偉好自修飾每整衣冠必使人持
巨鑑前後照之對客之際烏巾上微覺有塵即令侍妓
持紅拂以去之人有誤犯其家諱者往往遭其擯楚其
方嚴也如是光化初匡凝以太祖有清口之敗密附于
淮夷太祖遣氏叔琮率師伐之未幾其沁州刺史趙璘
越墉來降隋州刺史趙匡璘臨陣就擒俄而康懷英攻
下鄧州匡凝懼遣使乞盟太祖許之自是附庸于太祖
及成汭敗于鄂州匡凝表其弟匡明為荆南留後是時

唐室微弱諸道常賦多不上供惟匡凝昆仲雖強據江

山然盡忠帝室貢賦不絕太祖將期受禪以匡凝兄弟

竝據藩鎮乃遣使先諭旨焉匡凝對使者流涕答以受

國恩深豈敢隨時妄有他志使者復命太祖大怒天祐

二年秋七月遣楊師厚率師討之八月太祖親領大軍

南征仍請削匡凝在身官爵及師厚濟江匡凝以兵數

萬逆戰大為師厚所敗匡凝乃燔其舟單舸急棹泆漢

而遁于金陵後卒于淮南

新唐書云師厚繇陰谷伐木為梁匡凝以兵二萬溯江戰

大敗乃燔舟單舸夜奔揚州行密見之曰君在鎮輕車重馬輸于賊今敗乃歸我邪匡明亦謀奔淮南子承規諫曰昔諸葛兄弟分仕二國若適揚州是自取疑也匡明謂然乃趨成都歐陽史云行密辱過匡疑其後行密死楊渥稍不禮之渥方宴食青梅匡疑顧渥曰勿多食發小兒熱諸將以為慢渥遷匡疑海陵後為徐溫所殺

初匡疑好聚書及敗楊師厚獲數千卷于第悉以來獻匡疑弟匡明字贊堯幼以父貴一子出身為江陵府文學及壯以軍功歷繡峽二州刺史成汭之敗其兄匡疑表為荆南畱後未至鎮而朗陵之兵先據其城矣匡明領兵逐之遂鎮于渚宮天祐二年秋太祖既平襄州遣

楊師厚乘勝以趨荆門匡明懼乃舉族上峽奔蜀王建
待以賓禮及建稱帝用為大理卿工部尚書久之卒于
蜀

張佶不知何郡人也

九國志佶京兆長安人乾寧初以明經中第累遷宣州從事復為秦

宗權行軍司馬後與劉建
峯據湖南推建峯為帥

唐乾寧初劉建峯據湖南獨

邵州不賓命都將馬殷討之期歲未尅而建峯為部下
所殺軍亂鄰寇且至是時佶為行軍司馬屬潭人謀帥
曰張行軍即所奉也佶不得已而視事旬日之間威聲

大振寇亦解去

九國志建峯將吏推信為帥信將八府常所乘馬忽爾蹊齧不止正中信解信

謂將吏曰吾非汝主當迎馬公為之

乃謂將吏曰信才能不如馬公况朝

廷重藩非其人不可因以牘召殷亦不疑稟命而至信受拜謁禮畢命升階讓殷為帥信即趨下率衆拊賀乃自請率師伐殷攻邠州下之復為行軍司馬垂二十年殷果立大勲甚德信開平初殷表信為朗州永順軍節度使累加檢校太傅同平章事乾化元年夏四月卒于

位

九國志乾化初移鎮桂林卒于治所

詔贈侍中

雷滿

新唐書滿字東仁

武陵洞蠻也始為朗州小校唐廣明初王仙

芝焚劫江陵是時朝廷以高駢為節度使駢擢滿為裨將以

領蠻軍駢移鎮淮南復隸部曲以悍獷趨健知名中和初擅

率部兵自廣陵逃歸于朗江恣殘暴始為荆人大患矣率一

歲中三四移兵入其鄂焚蕩驅掠而去唐朝姑務息兵

即以澧朗節度使授之累官至檢校太傅同平章事滿

貪穢慘毒蓋非人類又嘗于府署濬一深潭構大亭于

其上每隣道使車經由必召讌于中且言此水府也中

有蛟龍竒怪萬態惟余能游焉或酒酣對客即取筵中寶器亂擲于潭中因自褫其衣裸露其文身遽躍入水底徧取所擲寶器戲弄于水面久之方出復整衣就座其詭誕如此及死子彥恭繼之

新唐書滿以天復元年卒子彥威自立弟彥恭

結忠義節度使趙巨凝以逐彥威

蠻蠻狡獪深有父風燼墟落榜舟楫

上下于南郡武昌之間殆無人矣又與淮蜀結連阻絕王命太祖詔湖南節度使馬殷荆南節度使高季昌練精兵五千遣將倪可福統之下澧州與潭兵合先是滿

塹沅江以周其壘門臨長橋勢不可入殷極其兵力攻圍周歲彥恭食盡兵敗間使求救于淮夷及淮軍來援高季昌逆戰于治津馬頭岸大破之俄而攻陷朗州彥恭單棹遁去馬殷擒其弟彥雄及逆黨七人械送至闕皆斬于汴橋下時開平二年十一月也

史臣曰成汭鍾杜田朱之流皆因否運雄據大藩雖無濟代之勞且有勤王之節功雖不就志亦可嘉若較其誠明則田頌延壽斯為優矣匡凝一門昆仲千里江山

失守藩垣不克負荷斯乃劉景升之子之徒歟張佶有
讓帥之賢雷滿辱俾侯之寄優劣可知矣

舊五代史卷十七

舊五代史卷十七攷證

梁書列傳七成汭傳唐宰相徐彥若○彥若原本作產
若今據新唐書改正

田頽傳延壽邇揚州一舍行密使人殺之○案九國志
行密迎至寢門使人刺殺之新唐書從九國志是書
以為揚州見殺五代史補又以為行密自奮鐵槌殺
之傳聞各異

雷滿傳彥恭單棹遁去○案通鑑攷異引梁太祖實錄

云彥恭沒溺於江通鑑從紀年錄作奔廣陵歐陽史

與通鑑同

欽定四庫全書蒼要卷五千四百十九

舊五代史卷十八

宋門下侍郎參知政事監修國史薛居正等撰

梁書第十八

列傳八

張文蔚字右華河間人也父禘唐僖宗朝累為顯官文蔚幼礪文行求知取友藹然有佳士之稱唐乾符初登進士第時丞相裴坦兼判鹽鐵解褐署巡官未幾以畿尉

直館丁家艱以孝聞中和歲僖宗在蜀大寇未滅急于軍費移鹽鐵于揚州命李都就判之奏為轉運巡官駕還長安除監察御史遷左補闕侍御史起居舍人司勳吏部員外郎拜司勳郎中知制誥歲滿授中書舍人丁母憂退居東畿哀毀過禮服闋復拜中書舍人俄召入翰林為承旨學士屬昭宗初還京闕皇綱寢微文蔚所發詔令靡失厥中論者多之轉戶部侍郎仍依前充職尋出為禮部侍郎天祐元年夏拜中書侍郎平章事兼

判戶部時柳璨在相位擅權縱暴傾陷賢儁宰相裴樞等五家及三省而下三十餘人咸抱冤就死搢紳以目不敢竊語其是非餘怒所注亦不啻十許輩文蔚殫其力解之乃止士人賴焉璨敗死文蔚兼度支鹽鐵使天祐四年天子以土運將革天命有歸四月命文蔚與楊涉等總率百僚奉禪位詔至大梁太祖受命文蔚等不易其位開平二年春暴卒于位詔贈右僕射文蔚沈邃重厚有大臣之風居家孝且悌雖位至清顯與仲季相

雜在太夫人膝下一不異布素弟濟美早得心恙

北夢瑣言

云張昺尚書有五子文蔚彛憲濟美仁龜皆有名第至宰輔丞郎

內一子忘其名少年聞壁魚食神仙字身有五色吞之可得仙因欲誑之遂

致心

疾文蔚撫視殆三十年士君子稱之子鑄周顯德中位至秘書監

薛貽矩字熙用河東聞喜人祖存父廷望咸有令名貽

矩風儀秀聳其與游者皆一時英妙藉甚于文場間唐

乾符中登進士第歷度支巡官集賢校理拾遺殿中起

居舍人名拜翰林學士加禮部員外郎知制誥轉司勳

郎中其職如故乾寧中天子幸石門貽矩以私屬相失

不及于行在罷之旋除中書舍人再踐內署歷戶部兵部侍郎學士承旨及昭宗自鳳翔還京大翦閣寺貽矩向為韓全誨等作畫贊悉記于內侍省屋壁間坐是謫官天祐初除吏部侍郎不至太祖素重之嘗言之于朝即日拜吏部尚書俄遷御史大夫四年春唐帝命貽矩持詔赴大梁議禪代之事貽矩至盛稱太祖功德請就北面之禮太祖雖謙抑不納待之甚至受禪之歲夏五月拜中書侍郎平章事兼判戶部明年夏進拜門下侍

郎監修國史判度支又遷弘文館大學士充鹽鐵轉運使累官自僕射至守司空在位綿五載然亦無顯赫事跡可紀扈從貝州還染時癘旬日卒于東京詔贈侍中張策字少逸燉煌人父同仕唐官至容管經略使策少聰警好學尤樂章句居洛陽敦化里嘗浚甘泉井得古鼎耳有篆字曰魏黃初元年春二月匠吉千且又製作奇巧同甚寶之策時在父旁徐言曰建安二十五年曹公薨改年為延康其年十月文帝受漢禪始號黃初則

是黃初元年無二月明矣鼎文何謬歟同大驚亟遣啟
書室取魏志展讀一不失所啟宗族竒之時年十三然
而妙通因果酷奉空教未弱冠落髮為僧居雍之慈恩
精廬頗有高致廣明末大盜犯闕策遂返初服奉父母
逃難君子多之及丁家艱以孝聞服滿自屏郊藪一無
干進意若是者十餘載方出為廣文博士改秘書郎王
行瑜帥邠州辟為觀察支使帶水曹員外郎賜緋及行
瑜反太原節度使李克用奉詔討伐行瑜敗死邠州平

策與婢肩輿其親南出邠境屬邊寨積雪為行者所哀
太祖聞而嘉之奏為鄭滑支使尋以內憂去職制闕除
國子博士遷膳部員外郎不一歲華帥韓建辟為判官
及建領許州又為掌記天復中策奉其主書幣來聘太
祖見而喜曰張夫子且至矣即奏為掌記兼賜金紫天
祐初表其才拜職方郎中兼史館修撰俄召入為翰林
學士轉兵部郎中知制誥依前修史未幾遷中書舍人
職如故太祖受禪改工部侍郎加承旨其年冬轉禮部

侍郎明年從征至澤州拜刑部侍郎平章事仍判戶部
尋遷中書侍郎以風恙拜章乞骸改刑部尚書致仕即
日肩輿歸洛居于福善里修篁嘉木圖書琴酒以自適
馬乾化二年秋卒所著典議三卷詞制歌詩二十卷牋
表三十卷存于其家

杜曉字明遠京兆杜陵人祖審權仕唐位至宰相父讓
能官至守太尉平章事乾寧中邠鳳二鎮舉兵犯王畿
讓能被其誣陷天子不得已賜死于臨臯驛曉居喪柴

立幾至滅性憂滿服幅巾七升沉跡自廢者將十餘載
光化中宰相崔胤判鹽鐵奏為巡官兼校書郎尋除畿
尉直弘文館皆不起及昭宗東遷宰相崔遠判戶部又
奏為巡官兼殿中丞或語之曰嵇中散死子紹埋沒不
自顯山濤以物理勉之乃仕吾子忍令杜氏歲時以鋪
席祭其先人同匹庶乎曉乃就官未幾拜左拾遺尋召
為翰林學士轉膳部員外郎依前充職及崔遠得罪出
守本官居數月以本官知制誥俄又召為學士遷郎中

充職太祖受禪拜中書舍人職如故開平三年轉工部

侍郎充承旨明年秋拜中書侍郎平章事仍判戶部庶

人友珪篡位遷禮部尚書平章事集賢殿大學士依前

判戶部及袁象先之討友珪禁兵大縱曉中重創而卒

末帝即位詔贈右僕射曉博瞻有詞藻時論稱之兄光

人新唐書表光
又字啟之有心疹厥疾每作或溢喙縱詬或揮挺追撲

曉事之愈恭未嘗一日少怠居兩制之重祖述前載甚

得王言之體北夢瑣言云曉貌如
削玉有制誥之才及典秩尚書志氣甚遠一旦

非分而沒咸寬惜焉豈三世為相道忌太盛歟

敬翔字子振同州馮翊人唐神龍中平陽王暉之後也
曾祖琬綏州刺史祖忻同州椽父哀集州刺史翔好讀
書尤長刀筆應用敏捷乾符中舉進士不第及黃巢陷
長安乃東出關時太祖初鎮大梁有觀察支使王發者
翔里人也翔往依焉發以故人遇之然無由薦達翔久
之計窘乃與人為牋刺往往有警句傳于軍中太祖比
不知書章檄喜淺近語聞翔所作愛之謂發曰知公鄉

人有才可與俱來及見應對稱旨即補右職每令從軍

翔不喜武職求補文吏即署館驛巡官俾專掌檄奏太

祖與蔡賊相拒累歲城門之外戰聲相聞機略之間翔

頗預之太祖大悅恨得翔之晚故軍謀政術一以諮之

蔡賊平奏授太子中允賜緋從平克鄆改檢校水部郎

中太祖兼鎮淮南授揚府左司馬賜金紫乾寧中改光

祿少卿充職天復中授檢校禮部尚書遙領蘇州刺史

昭宗自岐下還長安御延喜樓召翔與李振登樓勞問

翔授檢校右僕射太府卿賜號迎鑾協贊功臣太祖受
禪自宣武軍掌書記前太府卿授檢校司空依前太府
卿勾當宣徽院事尋改樞密院為崇政院以翔知院事
開平三年夏四月太祖以邠岐侵擾遣劉知俊西討郿
延深憂不濟因宴顧翔以問西事翔剖析山川郡邑虛
實軍糧多少悉以條奏如素講習左右莫不驚異太祖
嘆賞久之乾化元年進位光祿大夫行兵部尚書金鑾
殿大學士知崇政院事平陽郡侯前朝因金鑾坡以為

門名與翰林院相接故得為學士者稱金鑿以美之今

殿名金鑿從嘉名也置大學士始以翔為之

五代會要云以金鑿

為名非典也大學士

與三館大學士同

翔自釋褐東下遭遇霸王懷抱深

沈有經濟之略起中和歲至鼎革大運其間三十餘年

扈從征伐出入帷幄庶務叢委恒達旦不寢唯在馬上

稍得晏息每有所裨贊亦未嘗顯諫上俛仰顧步間微

示持疑爾而太祖意已察必改行之故裨佐之迹人莫

得知及太祖大漸召至御床前受顧托之命且深以并

寇為恨翔嗚咽不忍受命而退庶人友珪之篡位也以天
下之望命翔為宰相友珪以翔先朝舊臣有所畏忌翔
亦多稱病不綜政事未帝即位趙張之族皆處權要翔
愈不得志及劉鄩失河朔安彥之喪楊劉翔奏曰國家
連年遣將出征封疆日削不獨兵驕將怯亦制置未得
其術陛下處深宮之中與之計事者皆左右近習豈能
量敵之勝負哉先皇時河朔半在親御虎臣驍將猶不
得志于敵人今寇馬已至鄆州陛下不留聖念臣所未

喻一也臣聞李亞子自墨纒統衆于今十年每攻城臨陣無不親當矢石昨聞攻楊劉率先負薪渡水一鼓登城陛下儒雅守文未嘗如此俾賀瓌輩與之較力而望攘逐寇戎臣所未喻二也陛下所宜詢于黎老別運沈謀不然則憂未艾也臣雖駑怯受國恩深陛下必若乏材乞于邊陲効試末帝雖知其懇惻竟以趙張輩言翔怨望不之聽及王彥章敗于中都晉人長驅而南末帝急召翔謂之曰朕居常忽卿所奏果至今日事急矣勿

以為懟且使朕安歸翔泣奏曰臣受國恩僅將三紀從
微至著皆先朝所遇雖名宰相實朱氏老奴耳事陛下
如郎君以臣愚誠敢有所隱陛下初任段凝為將臣已
極言小人朋附致有今日晉軍即至段凝限水欲請陛
下出居避狄陛下必不聽從欲請陛下出奇應敵陛下
必不果決縱良平復生難以轉禍為福請先死不忍見
宗廟隕墜言訖君臣相向慟哭及晉主陷都城有詔赦
梁氏臣寮李振謂翔曰有制洗滌將朝新君翔曰新君

若問其將何辭以對是夜翔在高頭里第宿于車坊欲
曙左右報曰崇政李太保已入朝翔返室嘆曰李振謬
為丈夫耳朱氏與晉仇讎我等始同謀畫致君無狀今
少主伏劍于國門縱新朝赦罪何面目入建國門也乃
自經而卒數日并其族被誅初貞明中史臣李琪張衮
却殷象馮錫嘉奉詔修撰太祖實錄三十卷叙述非工
事多漏略復詔翔補緝其闕翔乃別纂成三十卷目之
曰大梁編遺錄與寶錄偕行翔妻劉氏父為藍田令廣

明之亂劉為巢將尚讓所得巢敗讓攜劉降于時溥及讓誅時溥納劉于妓室太祖平徐得劉氏嬖之屬翔喪妻因以劉氏賜之及翔漸貴劉猶出入太祖卧内翔情禮稍薄劉于曲室讓翔曰卿鄙余曾失身于賊耶以成敗言之尚讓巢之宰輔時溥國之忠臣論卿門地辱我何甚請從此辭翔謝而止之劉恃太祖之勢

案下有闕文

太

祖四鎮時劉已得國夫人之號車服驕侈婢媵皆珥珠翠其下別置爪牙典謁書幣聘使交結藩鎮近代婦人

之盛無出其右權貴皆相附麗寵信言事不下于翔當

時貴達之家從而效之敗俗之甚也

五代史補敬翔應三傳數舉不第發

憤投太祖願脩行陣太祖問曰足下通春秋久矣今吾主盟其為戰欲效春秋時可乎翔曰不可夫禮樂猶不相沿襲況兵者詭道宜其變化無窮若復如春秋時則所謂務虛名而喪其實效大王之事去矣太祖大悅以為知兵遽延之幕府委以軍事竟至作相

李振字興緒唐潞州節度使抱真之曾孫也祖父皆至郡守振仕唐

自金吾將軍改台州刺史會盜據浙東不克之任因西歸過汴以策略干太祖太祖奇之辟為從事太祖兼領鄆州署天平軍節度

副使湖南馬殷為朗州雷滿所逼振奉命馳往和解殷

滿皆稟命光啟三年十一月太祖遣振入奏于長安舍

于州邸邸吏程巖白振曰劉中尉命其姪希貞來計大

事欲上謁願許之既至巖乃先啟曰主上巖急內官憂

恐左中尉欲行廢黜之事巖等協力以定中外敢以事

告振顧希貞曰百歲奴事三歲主亂國不義廢君不祥

非敢聞也况梁王以百萬之師匡輔天子禮樂尊戴猶

恐不及幸熟計之希貞大沮而去及振復命劉季述等

果作亂程巖率諸道邸吏牽帝下殿以立幼主奉昭宗
為太上皇振至陝陝已賀矣護軍韓彛範言其事振曰
懿皇初昇遐韓中尉殺長立幼以利其權遂亂天下今
將軍復欲爾耶彛範即文約孫也由是不敢言振東歸
太祖方在邢洺遽還于汴大計未決季述遣養子希度
以唐之社稷欲輸于太祖又遣供奉官李奉本副介支
彥勳詐贖上皇誥諭至皆季述黨也太祖未及迎命振
又言曰夫豎刁伊戾之亂所以資霸者之事也今閹豎

幽辱天子不能討無以令諸侯時監軍使劉重楚季述
兄也舊相張濬寓于河南緱氏亦來謂太祖曰同中官
則事易濟且得所欲唯振堅執不改獨曰行正道則大
勲可立太祖英悟忽厲色曰張公勸我同勅使欲傾附
自求宰相耶乃定策繫偽使李奉本支彥勲與希度等
即日請振將命于京師與宰相謀返正未幾劉季述伏
誅昭宗復帝位太祖聞之喜召振執其手謂之曰卿所
謀是吾本志穹蒼其知之矣自是益重之天祐二年春

正月太祖召振謂曰王師範來降易歲尚處故藩今將
奏請徙授方面其為我馳騎以茲意達之振至青州師
範即日出公府以節度觀察二郞及文簿管鑰授于振
師範雖已受代而疑撓特甚屢揮泣求貸其族振因以
切理論之曰公不念張繡事耶漢末繡屢與曹公立敵
豈德之耶及袁紹遣使招繡賈詡曰袁家父子自不相
容何能主天下英士曹公挾天子令諸侯其志大不以
私讐為意不宜疑之今梁王亦豈以私怨害忠賢耶師

範洒然大悟翼日以其族遷太祖乃表振為青州留後未幾徵還唐自昭宗遷都之後王室微弱朝廷班行備員而已振皆顧指氣使旁若無人朋附者非次獎升私惡者沈棄振每自汴入洛朝中必有貶竄故唐朝人士目為鴟梟天祐中唐宰相柳璨希太祖旨譖殺大臣裴樞陸扆等七人于滑州白馬驛時振自以咸通乾符中嘗應進士舉累上不第尤憤憤乃謂太祖曰此輩自謂清流宜投于黃河永為濁流太祖笑而從之洎太祖受

禪自宣義軍節度副使檢校司徒授殿中監累遷戶部
尚書庶人友珪篡立代敬翔為崇政院使未帝即位趙
張二族用事遂為所間謀猷獻替多不見從振每稱疾
避事龍德末閑居私第將暮矣晉主入汴振謁見首罪
郭崇韜指振謂人曰人言李振一代奇才吾今見之乃
常人耳會段凝等疏梁氏權要之臣振與敬翔等同日
族誅

史臣曰文蔚貽矩皆唐朝之舊臣遇梁室之強禪奉君

命以來使狎神器以授之逢時若斯亦為臣者之不幸也抑不為其相不亦善乎杜曉著文雅之稱張策有冲澹之量咸登台席無忝士林敬翔李振始輔霸圖終成帝業及國之亡也一則殞命以明節一則視息以偷生以此較之翔為優矣振始有濁流之言終取赤族之禍報應之事固以昭然

舊五代史卷十八

舊五代史卷十八攷證

梁書列傳八張文蔚傳父禡○禡原本作錫今據舊唐書改正

薛貽矩傳在位綿五載○案歐陽史梁本紀貽矩開平元年同平章事至乾化二年薨計居相位六年歐陽史唐六臣傳貽矩為梁相五年卒尚仍是書之訛

張策傳父同仕唐至容管經略使○父同唐摭言作父同文歐陽史與是書合今仍之

自屏郊藪一無干進意○案唐摭言云趙少師崇疑主
文策求就貢籍崇疑庭諱之北夢瑣言載崇疑之辭
曰張策衣冠子弟無故出家不能參禪訪道抗跡塵
外乃於御簾前進詩希望恩澤是書謂張策無仕進
意與摭言諸書異

杜曉傳祖審權仕唐位至宰相○審權原本作省權今
據新舊唐書改正

沉跡自廢者將十餘載○案吳縝歐陽史纂誤云據新

唐書宰相表杜讓能賜死至崔胤領鹽鐵前後止七年
歐陽史作十餘年誤蓋歐陽史沿是書之誤

以鋪席祭其先人○鋪席原本作補席今據歐陽史改
正

敬翔傳因金巒坡以為門名○金巒歐陽史通鑑俱作
金鸞五代會要從是書今仍之


從嘉名也○案原本脫名字今從職官志增入

宿於車坊○車坊原本作中坊今據歐陽史及通鑑改正

李振傳劉中尉命其姪希貞來計大事○希貞原本作希直今據通鑑改正

又遣供奉官李奉本○案原本脫奉本二字今據本傳增入

舊相張濬亦來謂太祖曰同中官則事易濟○案舊唐書昭宗紀崔胤與張濬告難於全忠濬傳亦云濬致書諸藩請圖匡復是書作張濬黨於季述為梁祖所拒與唐書異



總校官庶吉士 日程嘉謨
校對官中書 日吳翼成
日譚湘鏡